

T5236.7/2213

51

七

三

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE  
MAR 14 1932

皇明文徵卷六十二

晉江何喬遠碑孝選

傳二

孝烈

王叔英

二孝子傳

余在眾中往往聞孝子慈弟義婦事未嘗不為  
之感激流涕欲錄傳之以為世勸而報不得其  
詳洪武某年間有兄弟二人以其伯兄坐法當

皇明文徵卷六十五

晉江何喬遠釋孝選

哈佛大學哈佛燕京圖書館珍藏印

傳二

孝烈

王叔英

二孝子傳

余在衆中往往聞孝子慈弟義婦事未嘗不爲之感激流涕欲錄傳之以爲世勸而恨不得其詳洪武某年間有兄弟二人以其伯兄坐法當

死各自縛爲當刑者哀訴于午門願代兄死

上問其故二人者言曰臣少無父非兄無以至今日今兄當死臣誠不忍見兄死而獨存故願以二身贖兄一身惟

陛下聽之

上疑其非誠或有教之者因許其代而戒行刑者曰第試其人如有難色則殺之無難色則舍之二人者皆延頸待刃遂止不殺一時見聞者無不歎息泣下

上大嗟異之將赦

其兄命未下御史大夫陳寧獨以爲不宜以是

率殺其兄此可謂慈弟也又得婦四人焉其一  
人夫爲變得罪臨刑戒之曰吾死汝少年貧無  
以爲守當再嫁耳慎勿嫁軍人農人樵夫庶可  
相保也語時當深塹上謂夫曰汝尚未知吾志  
乎遂投于塹而死其一人夫臨刑脫首簪布酒  
肉啖之曰吾當與子共死也竚視其夫河橋上  
夫旣死卽自投于河又其二人妯娌也其夫兄  
弟以黨人受戮家人財產盡没于官婦人則當  
給爲官婢其妯娌二人相謂曰吾夫已死吾二

人縱無他辱於義猶難獨生况又有他辱乎遂皆自經而死是四婦者可謂義矣余欲各爲之傳以傳於世旣不得其人之姓名與其事之詳以是輒不得發以余一人所聞如此則余之所不聞者可勝道哉余觀前代史傳求其事之卓絕如此者盖寡豈多有其事將亦如余之不聞其詳而不得錄邪抑異時誠少有之而特盛於今邪余固不得而深辯矣然幸而得其詳者烏可使之無傳乎余於同邑得一人焉曰陳圭於

同郡得一人焉曰朱煦皆孝子可書也作二孝子傳

陳圭字錫玄台州黃巖人也其父叔弘與其鄉人多讐圭常諫之後其讐人以賊告叔弘罪當死圭以狀告於通政司曰圭爲子不能諫其父以陷於不義得罪死此圭之不孝所致義當死罪於圭之身原圭父使將自新誠不勝至願通政司以聞

上大喜曰不意今日乃復有孝子宜赦其死俟天下百官朝覲將播告之爲

天下勸頌之刑部尚書開濟奏曰罪有常刑不宜屈法以開僥倖之路請論如法遂聽圭代父死而謫其父叔弘隸兵雲南聞者皆歎圭之孝而惜其死嗚呼圭之死固圭之志也於圭何憾哉

朱煦台州仙居人也家世儒者母楊氏性嚴急遇諸子未嘗借色辭少不如指必笞擊至馴伏乃已煦事之盡恭順之道其伯父二人長季敬次季誠煦皆善事之二伯父俱有令望嘗稱之

曰是姪真猶子也其父季用繇薦知福州府洪武十八年詔天下盡革今歲以上有司積歲官吏爲民害者季用視事僅五月爾以例起入京吏一以法論罪作城須役嚴償重日用錢數十緡季用又病痢被楚謂煦曰吾貲力豈足堪此吾且夕死矣汝勿深憂但收吾骸歸葬耳煦惶懼不敢離左右復戒二弟熊正共守不敢少寐季用繇是不得死時役告枉者甚衆令益嚴告而謫隸兵雲南者二人被極刑者四人矣煦不

顧死而陰與父僚友同役者謀曰吾無術以脫吾父矣訴不訴皆死萬一吾父繇訴獲免雖戮死萬萬無憾遂陳其辭于通政司通政司爲陳於上觀其情遂赦季用而復其官同時以煦告得免復官者一十四人皆拜煦父謝曰微君有孝子吾儕骨肉爲城下土矣已而煦感疾死其十四人者哀臨猶已子季用傷煦死病益甚亦死或者以煦冒死得免爲幸而又以其父子終俱死爲命嗚呼爲煦者知盡子職而已其他曷足計哉

劉文卿

王孝子俞烈婦傳

王世名字時望婺之武義人其先未知所自性聰毅年十七從師韓光濟治業焉持糧游他境萬曆四年父王良四十三爲仇王俊廿六所擊中要害死世名馳歸則就木焉世名不及訣且未敦器也痛欲絕念以狀聞郡縣抵其罪法殺人者死然不診驗不成殺也世名抱其母泣曰

吾安能殮仇而不暴吾父乎族衆遂得請入仇  
產因涕泗哀呼爲寢其事亦不欲傷母志也於  
是繪父像已持劍於其側問之則曰古人佩劍  
自礪吾薄飾以待乃翁不亦可乎跪起號慕服  
闋不輟三年補弟子員謂其妻俞氏曰吾以儒  
服見先人汝其謂適乎吁嘻哉慶者在屋吊者  
在堂俞習其所夕怍坎聞之憮然而未有以言  
也時仇亦來會世名攬涕接之亡何而生子狂  
喜大異謂俞曰婦知是何等兒也吾不能復須

矣大飲達旦終不能微示於母知我有所必死  
而哀阻及也哀阻則事不就九年正月遂斬其  
仇於蝴蝶山下叱劍而號衆曰仇殺矣余惟不  
能愛身而濡恥也族衆嗟咄觀者如堵名神色  
自若歸報母尋出其所受識仇產租數與其手  
刃仇者以聞於縣疾走入獄武義令呼曰子出  
矣吾將置子於別所上狀於部使者竟以兩令  
質之金華令曰俊廿六爲殺生父者宜伏毆刀  
然殺不在生生爲報非爲殺也誠得而父傷者



吾焉不能捨勁烈之士哉令出坎焉辨之世名  
大痛曰余固欲受辭殺也以及於此苟自戕伐  
吾父當被害時寧不能見賢令耶仇母用名誅  
矣朽骨起於修夜發掘見於後嗣吾曾不能軼  
絕曹娥而幽掠吾父也令令之歸俟再訊焉則  
陰令將其父棺以至因以減死論世名望見父  
柩遽以頭擊石血漬殷地大呼曰父不再辱余  
不再生嗟乎余欲一死不得矣光濟知其志不  
可奪進曰宥善人者君也寶藏齒者名也卽令

決於君前不如緩哉君止矣兩令悽歎去之父  
喪以故得全時邑里皆臨無不悲咽大號是夜  
持母泣曰子之命也夫義不危親孝不毀性死  
父而失母其何能爲九原可作能無懟乎遂屬  
其妻與子於光濟閉哈不食死猶懷其父主柩  
云先時生入仇產歲得租變值封藏之仇饋則  
拜語則諾也連牆而居善自匿以故仇不爲備  
其自鑄劍私獨銘之曰報仇曰夫差爾忘越王  
之殺而父乎妻與母莫之識及斷其頭顱而出

之時年廿一子宗禹嗣

劉侯如曰天性之於人湛矣安丘捐市辱之生  
趙娥略夫家之等斯以纖芥發憤帷袿立懦者  
哉放此爲報則需時日以斷凶慙者無或激焉  
要其磨志繪俠後嗣逢生平而不憂固足以暢  
其往懷而欲惜此委蛻倖爲全人霜介之志未  
之或知也世或軌以他衷嬰燕人之悲慕效牧  
豎之殘照斯君子所以無從容也周禮曰凡和  
難父之仇則辟之海外亦以謹避善良直情彰

枉迨夫姦軌竄迹借交斯宏則夫暴骨定情矯  
徒無所仁孝之士其能忍乎用斯自殞古今同  
嘆是故邳暉出笏卒爲漢良輿情不聞惡可格  
之峻文三代所以成其明詰也嗚呼又可已哉  
王世名妻俞氏武川俞源里人父聰爲後母所  
鞠性惠婉婉嫵有修容年十七歸世名時舅已  
斃於仇見其夫怏怏不寧問之故不告曰我兒  
女子固不宜知君然君行婦自同此遂以夫有  
所閉也而置之心識其爲舅恨也世名有所居

密室每戒其至輒理香擎跪其前誦所彙忠孝編俞一日偶見之則泫然淚下曰君固惡其謀及婦人耳敢不重閉乎世名於是食舍肉俞謬之曰子豈爲大士也者以爲穢其戒體哀毀而瘠母何賴焉然終弗之奪也明年生子宗禹夫祝曰善視我兒先君其不餒矣俞心諱其說時仇以慶事至室生退而目之曰彼遂偃蹇者不食麥矣俞益用驚念然以其夫非實不先白正月世名遂斬其仇以歸婦姑相視駭愕世名曰孤之生也獨不得刃父仇逡巡數年所以不告母若妻者以有手讎之心吐之則衆止我衆止則泄今長棄母矣我爲不孝子而妻爲賢妻善事姑以卒我志遂就縣械故事囚親家屬無有令不拘而舍之故妻與母皆從焉俞哀謂生曰梁氏妻能自毀夫與之偕隱余偕子死不難爲也生曰母老子弱王氏成敗其在汝矣俞恨然曰請以三年勉爲子留越此余不能忍也生俛首不荅淚數行下俞於是絕而甦者四世名竟

不食死俞復不能食韓生與弔其廬使媪譬之曰前與生言而忽棄之不祔紼春之寄若姑能任之耶視汝呱呱者何如耳乃就食屬姑病乃輟哭內哀嘗醫藥媳事如生事焉不解結禭者數月俞三年食息於柩野瘠不避也有伏棺扞火所不足爲者一日姑叔議遷柩於外楹俞大慟曰死生異路故他適耶君內吾內而不出君出吾出而不內矣吾與生言此其期乎遂盡移其簪珥業壤焉以遺貌孤絕食數日就姑拜焉曰今以五歲子賴姑而姑固長年撫之也理笄拭髻死於棺側時年二十二鄉里無少長皆奔號之是日雨雪交涕山川縞冥弔者無不哀慘執宰以事上天子賜賻三十兩宇祠一區今後世追思焉

劉侯如曰巾櫛以之有賈無二夫慮不經倉卒幸全則名虧齒劍則節壯時蓋不可已也俞氏之於長懷盡矣而立孤下報三歲幾何道韞之優游會稽有以也王郎以難殞生世名以仇致

命安否蓋大異焉侍慈哺幼待盡以踐然諾又何愧耶觀夫司敗自束泣血爲期骨肉之際諒乎與其烈思壯哉以哀滅也

讚曰玫瑰同穴夫婦剛烈怙戀仇分身摧憲設  
拱木懼侵冗回潛默三歲室勞厚儀母揭菸邑  
衰茨翔陽微滅熊虺朝俘兩奇繼殲夫非名浮  
噎憎痛骨雲闇天迴怯夫壯律

節烈

楊慎

孝烈婦唐貴梅傳

烈婦姓唐氏名貴梅池州貴池人也笄年適朱  
姓夫貧且弱有老姑悍且淫少與徽州一富商  
有私弘治中富商復至池一見婦悅之自拊心  
曰吾無頭風何以老嫗虛拘哉乃密以金帛賂  
其姑姑利其有誨婦淫者以百端弗聽迫之弗  
聽加以箠楚弗聽繼以炮烙體無完膚終不聽  
乃以不孝訟於官通判慈谿毛玉亦受商之賂  
倍加官刑幾死者數商猶慕其色冀其改節復

令姑保出之親黨咸勸其吐實婦曰若然全吾名而汙吾姑非孝也乃夕易袿襦雉經於後園古梅樹下及旦姑不知之也將入其室挺之手持桑杖且罵且行曰惡奴早從吾言又得金帛且享懽樂今定何如而自苦乎入室無見尋之至樹下乃知其死姑大慟哭之親黨咻之曰生旣以不孝訟之死乃稱嫗心何哭之慟姑曰婦在吾猶有望婦死商人必倒贓吾哭金帛不哭此惡奴也尸懸於樹三日顏如生樵夫牧兒咸爲墮淚每歲梅月之下隱隱見其形冉冉而沒有司以礙於府官之故終不舉余舅氏喻士積薄遊至池州稔聞其事作詩弔之歸屬慎爲傳其事嗚呼婦生不辰遭此悍姑生以梅爲名死於梅之株冰操霜清梅乎何殊旣孝且烈汗青宜書有司失職咄哉可吁乃爲作傳以附露筋碑之跗

吳國倫

莊節婦傳

太史公嘗悲巖穴之士名湮滅而不稱嗟乎巖穴之士猶有稱者而獨處身泥垢若所謂男而胥婢女而婦奴卽有奇節不得負青雲之士以傳豈賤其人而羞稱之乎夫管仲父之舉甯戚也以婢知其詩周大夫有其婢賢爲能忍辱甘死以全其主父母不可謂細行矣曾不得少概見至如翟家婢青死其主女卽因主女見列繇古及今其不有所因而稱者又何可勝數乎予所聞里中莊八兒死節事竊不勝其悲矣八兒郡富口人莊寧女寧父祖三世爲莊家奴遂冒莊姓八兒年十六嫁劉學良學良亦人奴子越一年病卒葬舍傍八兒執喪甚哀日舉案進食哭奠於墓婁絕復甦久之爲舅姑所厭欲嫁之八兒以死拒又數月有少年傭耕者見八兒悅之求爲贅婿其舅姑業已納聘而使八兒母從與之八兒自度不能抗佯許焉傭遂爲期以請至期八兒與其奴方晨春私謂奴曰明日不相春矣奴不解其意少選又與市易簪曰他日見

簪母相忘也姒益疑之至暮忽改新粧出拜舅  
姑舅姑不知其訣也以爲將受婿而喜之須臾  
入室自經死夫八兒以人奴子爲人奴婦至微  
賤矣又年少質弱卽依違其舅姑非有門閥可  
損寶訓可辱也顧獨視再適爲汙而甘死若飴  
茲不凜凜丈夫女哉彼以富人子而有文君名  
人子而有文姬豈得與八兒論貴賤哉語云金  
生沙礫珠出汗泥信矣信矣

義烈

王禕

劉燾孫傳

劉燾孫字長吾茶陵人宋丞相沆之十四世孫  
器貌瓌宏有文學後至元丙子遊京師以民間  
俊秀用薦者得自入國子爲弟子員積分及優  
等至正戊子會試下第以例署常寧州儒學正  
壬辰天下兵起紅巾亂湖南常寧陷州長貳皆  
棄城遁燾孫獨不去因集民爲兵有衆萬計克  
復其州治就以民兵守之總兵者嘉其功言燾



孫當起陞知其州事未報其年冬武岡洞獠寇常寧於是常寧以糧匱援絕復陷燾孫乃率其餘衆退保溫江原結寨以爲固已而紅巾有羅甲者復來攻其寨燾孫力與戰以衆寡不敵見執燾孫有女甲欲取之使謂之曰予吾女者免若死且必厚相遇卽不予死不可免死後女終爲我有若其圖之燾孫大罵曰賊狗奴我天子諸生受國名爵義當死報國死吾所也寧得以女予賊求活邪我死卽吾女爲賊有豈復顧哉賊留之者五日日以甘言誘之燾孫不爲訕絕不飲食而罵聲不絕口遂遇害賊黨有義之者以棺瘞之州西門沙上賊旣退發棺重斂之以葬顏面猶如生湖廣省臣及部使者皆具其死事以聞燾孫有同母兄畊孫字存吾至順庚午進士仕爲寧國路總管府推官至正乙未長槍陷寧國亦執節死之

史官王禕曰嗚呼元之有國餘百年其德澤之入人亦深矣及其亡也服節死義者雖往往而

有然卒未嘗多見焉豈余之聞見不廣歟抑死者人之所甚愛而又世道不古若故其能以忠義自許者或寡歟余頃奉

詔修元史於凡

以死殉國者必謹書之厲世教扶人紀也當時得畊孫死事既已登載而有司不復以燾孫事來上使其傳闕焉何世之不樂成人之善者類如是歟燾孫之子穎方以學行用世爲余道其父事甚悉余固信之因爲著之于篇以補史之闕文

高啓

胡應炎傳

胡應炎字煥卿常之晉陵人宋樞密副使宿八世孫也父聰淮南節度計議官咸淳中應炎登進士第授溧水尉未赴元丞相伯顏南伐師次常境知府王洙遁朝廷以姚誾知府事復命將軍王安節都統劉師勇將兵雜守之誾等至常見應炎喜曰君吾劇孟也得君敵不足破矣署節度判官應炎歸告聰及兄應發弟應登曰吾

家世受國恩今戎馬在郊王室將危是吾立功之秋也父老兄弟當奉以出避吾身許國不得復徇家矣聰應發並曰吾與汝雖父子兄弟然於國則皆臣也圖報之義彼此同之豈可臨難而獨免乎乃命應登侍母及護妻子出城囑曰善避以存吾宗不幸城亡吾必死之今與汝訣矣旣應闇命卽選民之壯勇者三千人自將乘城爲闇畫曰吾州京師北門不可失守然城卑塹狹兵皆市人非素所撫循者而北兵銳且衆乘勝遠來其鋒不可當恐未易與戰也宜樹木柵傳城益調粟繕械爲守計闇然之初洙遁時其客王虎臣盜郡印自稱知府詣伯顏軍門獻之伯顏不知其詐命還守常而遣兵與俱及城闇等已先至不得入反以民叛告伯顏怒命元帥唆都率步騎二十餘萬圍之應炎與安節師勇分門出戰各累大捷殺其將校甚衆功上進直秘閣圍且久元兵多傷斃唆都請益師伯顏遂以西域諸部兵來會攻圍益急餉援俱絕唆

都以木不可拔剽近野得婦人剝乳煎膏沃其上發火矢射之火熾柵焚又運機石擊樓堞盡毀食盡唆都偵知之遣使呼應炎語諭使出降應炎罵之且截紙縷置于盃中若湯餅狀者以箸引示之曰吾食甚足若欲得城需金山長老金山長蓋諺語謂無其期唆都聞之曰能破城者金山長老也世呼寺主僧爲長老故云卽趣召金山僧至軍問以攻城之策僧不知爲計周行視城曰是城龜形也東南其首西北其尾攻尾則首愈縮其法當攻首從之城遂陷師勇遁閻安節死之應炎率民兵巷戰至孔子廟前衆潰猶手刃數人力屈遂就擒唆都讓之曰若卽嘗多殺吾將校者邪應炎曰吾欲殺汝何將校也恨力不及耳唆都怒腰斬之時年二十七兵入屠城聰應發皆被殺民匿溝中免者數人余爲兒童時常聞父老言元兵取常時事甚悉及壯觀史多所未載豈蒐采有失而致然歟抑著作有所諱避而弗錄歟或其事多繆悠初皆

無有特好事者爲之說歟是皆不可知也每竊恨焉近遇胡黼江上間爲余言其祖應炎死節始末與余昔所聞無異斯固足徵矣夫以虎臣之奸峻都之慘與僧者妄言而幸中其事雖微猶不可使泯况應炎之忠烈毅然如是邪因掇其語作胡應炎傳以補史氏之闕云

蘇伯衡

胡嘉祐傳

義士胡嘉祐永康人字九祚永康在婺之東南

在處之西去處之縉雲可三十里元之季處屬

縣寇蜂起元帥石抹宜孫雖剪之以兵不能止

也於是縉雲蒞之寇應氏杜氏以乙未冬溢

出永康境上殺掠以逞嘉祐蹙然曰鄉鄰有急

可坐視之乎走縣白令願助官殄寇令問安所

得兵乎對曰募武健之士又問安所取錢乎對

曰請輸家財令曰善卽歸散家財募武健之士

得千餘人而什伍之大署其旗爲義兵寇至輒

迎擊繇是寇奪氣遣其徒黨來降嘉祐以爲寇

特詐降以怠我師耳益訓練其衆候伺明年四月寇果復擣縣郭焚廬舍入據縣治四出殺掠郡將勒兵致討嘉祐率衆助郡將遂復縣治郡將駐縣中其帳下士間出暴橫嘉祐乃排帳直入問郡將曰將軍之來吾以爲欲爲民除殘也豈意乃助寇殘民乎郡將戟手罵曰若真愚人我惟不忍民之殘於寇也故勒兵而來除寇何廼謂助寇殘民嘉祐曰卽如是兵士暴橫何不禁郡將遂拔帳前旗予嘉祐曰其樹之吾兵士

有敢擾吾民者立斬旗下嘉祐出旗門於鄰宣言曰將軍令擾民者斬此旗下於是士卒不復出縱出亦不敢暴橫鄉井乃安堵令計事廉訪司廉使問令縣有可與共患難者乎對曰有胡嘉祐文學趙存誠者其邑子也乃從旁言小人習知之此人以重義著聞縣中嘗有人媚嫉之而誣污以大罪賴無左驗得釋及其人賊殺家奴誣人事覺抵罪咸勸之曰此報怨時也輒謝曰人以計傾我我亦乘其阨而傾之人固可鄙

而我獨非鄙人哉終不報怨凶年鄉人粉草根  
木實以爲食誠諸子曰人皆饑餓我與若獨飽  
安乎亟發廩賑之其他存恤族姻鄉黨之孤者  
寡者疾病者未易以一二數此其重義蓋天性  
然也真可謂共患難者廉使乃爲檄署曰義士  
胡某使使卽軍中授嘉祐俾統諸義兵殄寇且  
給以鎧甲之屬嘉祐遂與方允中等引兵去縣  
五里而屯于鯉溪或言此寇往來處奈何屯此  
嘉祐曰是乃吾所以屯此也非以我等之衆足  
以殄寇也助官軍作聲勢捍蔽鄉井耳我等在  
此則寇不敢越而深入寇不敢越而深入則自  
此以西可保無他虞矣奈何不屯此時呂玄明  
壁方巖自守亦致書嘉祐曰君提孤軍當據衝  
恐非萬全計爲君計者莫若去鯉溪壁方巖而  
共守焉乃可萬全也嘉祐曰吾將排難以保鄉  
邑此吾衆之所以集也若去難就易此皆爲身  
謀而不顧鄉里相扶持之義者也我豈忍爲之  
不往而諸堡受圍輒分兵救之往往以寡勝衆

丁酉正月大破寇於武平於合德二月又破之前倉乘勝追北至黃碧又明日寇乃盡銳從間道繞出方巖呂玄明與戰巖下其徒孫伯純戰死嘉祐聞事急以明日黎明引兵往助玄明遇賊于占田遂大戰而寇至者滋多嘉祐顧謂方允中等曰衆寡不敵矣退且中覆也惟力戰耳自辰達午戰不利方允中呂伯順死于陳嘉祐厲聲曰終不令兩賢獨死義且戰且罵不旋踵死之縣令野速達而聞之曰嗟乎胡義士未嘗有斗祿寸組一旦緩急而能以私財私廩贍鄉兵屢挫賊鋒利安一邑吾屬爲天子名吏顧不知爲計至其斃於鼠輩又不能援之吾屬不獨大媿於心其負忠義士抑亦甚矣爲之流涕率諸義兵發喪而以禮祭之

史氏曰元制復一縣者賞官六品不幸而死于難則視其所當得官超一等褒贈之嘉祐於制得褒贈郡爲上請報未下而天兵取婺城褒贈竟不及矣洪武巳酉詔修元史嘉祐於法得立



傳其子以事在前代無裨聖朝既不敢以聞而時人又無能以其事送史館以故秉筆者亦莫得而登載焉有如嘉祐之所樹立豈以褒贈不褒贈立傳不立傳而加損哉夫其以義自奮志在為國殄寇以身殉之且猶不恤况家財乎斯可為大忠矣苟無稱焉則何以激勸哉余過永康父老為余言是以具著之

侯一元

趙烈士傳

嗚呼野馬滅日月揭江河急砥柱立庶草歇孤松桀百鳥匿獨鶚擊天地萬物盡然而况人乎予嘗感慶卿聶政之事其始以親故不敢死目攝不足死而不死其既也七尺之軀若委土焉勇怯之用庶幾乎龍蛇而君子吝之以其用死睚眦攻伐之間也如今敵君父之愾除宗國之恥即司農之笏常山之舌曷殊焉悲夫處死之難也雖然抵鵠之玉惜矣豈比莽大夫明哲長樂老優游瓦全者哉奈何一槩之刺客靡乎歲

嘉靖壬子賊連倭夷劫海上所至戎士鼠竄公  
私狼顧莫有死綏櫻賊者賊狙勝益深遂燒黃  
巖轉掠不復制樂東鄙趙氏居水坑者世家也  
賊以巨艦一夕奄至其聚趙之士女或執或逃  
賊既悉輦其貲方整居放兵四劫凡趙氏豪傑  
素稱驍健者皆走匿喙息草間無敢出氣天不  
滅趙氏烈士蹶興迺趙君某者聞難則辟其妻  
子他所已乃大呼持挺出擊連仆數賊顧呼其  
子弟曰勿走賊易與耳又前更擊遂突入其陣  
意氣彌厲賊走且僵盡釋係累委鹵獲道上以  
餌追者後援不繼一賊出于厠縱君以矛傷腋  
悶絕然賊亦破膽迸逸趙子弟緣君而奮者五  
人甌盤傳定頌相與尾擊乘勢逐賊及舟迺還  
是日也斬獲首虜三賊扶傷而歸死者無筭子  
女之俘取之賊手課義籌勲君爲最焉君旣輿  
歸其家猶呼其左右曰賊可擊也盍掖我以從  
賊復起行數十百步距躍高岸困頓乃還且死  
家人環而哭之君張目曰勿哭人百年會有一

死吾今者脫嬰孺於屠剝免婦女於僂辱不巖  
先世之宇不隕家聲吾則有以死矣語卒迺絕  
君家徒四壁非有錢財顧惜也平生言訥訥不  
出口非賈勇者也又非素學問習聞仁義舍生  
也其敢決輕死蓋天性然不以借客探丸而以  
捍宗斯狼睥所以君子也維時大中丞王公聞  
而賞之曰嗟嗟烈士哉介冑之士有餘忸矣爰  
蒐戎壘用鉞惰驕河陽之幟一朝改色於是大  
將臨戎輕舟破浪遂一鼓而破賊人曰大中丞  
之伐茂矣然楚國之勇激于式螳大中丞按劍  
擊節咨嗟乎烈士而海賊湍潰有以哉有以哉  
固知威天下者鈎戟長鎗不銛於節義也或曰  
往者賊入黃巖宿留其地延及旁邑村落數十  
百里皆盡向非趙君之死吾邑亦斷左臂矣蓋  
安平以晝邑始義淮陰以睢陽扞蔽事有瑣而  
功鉅者孰知君之爲烈哉嗟乎君則死矣而名  
不滅彼求活草間者寧終不死耶更數十年卽  
皆湮滅澌盡與鳥獸草木同腐孰與君久長哉

趙宗之良其其爰相與伐石表君之烈以風後人

奇節

胡翰

謝翱傳

謝翱字臯羽建寧人也家故羸於財父鑰居喪哀毀人稱其孝宋咸淳初翱試進士不第慨然求諸古以文章名家元兵取宋宋相文天祥亡走江上逾海至閩檄州郡大舉勤王之師翱領

家貲率鄉兵數百人赴難遂叅軍事天祥轉戰閩廣至潮陽被執翱匿民間流離久之間行抵勾越勾越多閩閩故大族而王監簿諸人方延致遊士日以賦詠相娛樂翱時出所長諸公見者皆自以爲不及不知其爲天祥客也然終不自明且念久不去人將虞我矣乃去而之越之南鄙依浦陽江方鳳時永康吳思齊亦依鳳居三人無變志又皆高年遂俱客吳氏里中得其餘日以自適一不問當世事翱嘗上會稽循山

左右窺祐思諸陵西走吳會東入鄞過蛟門臨  
大海所至歔歔流涕晚愛睦州山水浮七里瀨  
登巖光釣臺北向舉酒以竹如意繫石歌曰蒐  
歸來兮何極蒐去兮關水黑化爲朱烏今有噉  
焉食歌已失聲哭人莫詰其誰何唯鳳與思齊  
深悲之初江端友呂居仁朱翌辟地白雲源源  
故方干所居在釣臺之南翔率其徒遊焉願卽  
此爲葬地作許劍錄及翔居錢塘病革語其妻  
劉曰我死必以骨歸方鳳葬我許劍之地鳳聞  
訃訖如其言鳳字韶卿繇太學生授容州教授  
治毛氏詩陳宜中當國禮下之命其二子大登  
小登受業焉同鄉黃潛柳貫皆出其門好獎拔  
士有一善未嘗不與之進思齊字子善其學本  
之外祖陳亮用蔭補官攝嘉興丞數以書干宋  
臣用事者言賈似道母喪不宜賜鹵薄責文及  
翁顧忌爭不力猶不爭耳又言御史俞浙以論  
謝堂去職宰相附貴戚塞言路如朝廷何思齊  
雖有寒疾耳聾遇事不以勢移不以貧屈自號

全歸子云

媯仲子曰翰少客浦陽望仙華寶掌諸山從縉紳學者問翱時事未嘗不喟然爲之太息於是訪其論著之文翱有晞髮集鳳有巖南集思齊有全歸集三家者惟翱集備焉其辭隱其指微大要類其行事是時元新有天下士大夫於宋事多諱言之鄞江任士林稱翱善哭如唐衢豈其情哉豈其情哉

張孟兼

唐珏傳

唐珏字玉潛會稽人也少孤能力學以明經教授鄉里子弟而養其母至元戊寅浮圖總統楊璉真伽利宋殯宮金玉故爲妖言惑主聽發之珏獨懷痛忿乃貨家具行資得白金若干爲酒食陰召諸惡少享於家衆皆驚駭前請曰平日且不敢見今召我飲又過禮不審欲何爲雖死不避珏因泣數行下謂之曰爾輩皆宋人吾不忍陵寢之暴露已造石函六刻紀年一字爲號

自思陵以下欲隨號收殯之衆皆諾中一人曰  
此固義事也然今無有知者恐萬一事露禍不  
測不得終志柰何珏曰吾已籌之矣要當易以  
他骨衆如珏言夜往收貯遺骸瘞蘭亭上山後  
上種冬青樹爲識約明日復來會出金帛爲人  
人壽戒勿泄也璉又易宋內爲諸浮圖乃哀陵  
骨雜馬牛枯骸築白塔號曰鎮南以爲陵骨良  
已鎮而不知真之他存也亡何汴人袁俊爲越  
治中招珏爲子師間問曰吾聞越有唐姓瘞宋  
諸陵骨豈君邪坐有指珏者俊大奇之手加額  
曰先生義士哉豫讓不及也竊聞高義之日久  
矣不意得與先生處因訊珏以故甚貧後亟爲  
買田宅居之先是珏臥疾一夕夢吏持文來召  
曰帝召君速之行至見宮闕邃麗一人冕旒中  
坐旁一人延上殿又數黃衣進揖珏曰賴收遺  
骸無以報俄曰第報良田二頃有妻孥以養乃  
復揖及闕翻然而北覺莫省謂何已而會俊料  
理事如夢中始悟有徵矣有謝翽者文丞相客

也與珏友善嘗感珏事爲作冬青樹隱語甚悽  
苦時讀者莫不灑泣翺字臯羽閩人亦奇士云  
傳者曰余讀晉世家知趙氏有後矣非程嬰公  
孫杵曰莫存其孤今十七廟不食而有暴骨之  
難獨珏能葬之甚義乎哉嗚呼珏一布衣爾其  
義視程公孫何媿哉千載而下有國士風之者  
非珏誰歟

徐一夔

洛下遺民傳

余遊虎林蓋嘗登伍大夫之山而望焉見夫山  
川迴合城廓宏固邑屋鱗次嘆曰繇宋涉元休  
養生息其盛極矣自罹兵燹于茲二紀其殷庶  
之積視他郡縣猶盛夫豈無瓌偉不羣之士雜  
處里閭而不自衒者安得見之以寫我憂下至  
山址見有一士長七尺餘戴古冠巾穿白練袍  
色如雪束黃絲紉齊曳地目瞳子炯然風約疎  
髯灑灑可數行通衢中高視闊步世俗莫能溷  
余甚異之而未敢卽也從其所之前遇高丘輒



躡屨而上仰而若吁俯而若思歌曰陟彼高丘  
兮面彼圻矣維谷則崇兮陵則夷矣代有禪續  
兮罔測其微矣彼淪以胥兮而我則遺矣西山  
之人兮吾將從之歸矣莫測其所以余揖而問  
之曰先生爲誰瞪目熟視余久之徐曰我洛下  
遺民也安用問我爲余不敢詰謹識之他日見  
汝南生以問焉生曰此吾故人程彥澤君也君  
蓋河南先生純公之後其大父嘗爲言官至元  
大德之間以直道著君少有氣節高自稱許歛  
樹立奇勲名恒自誦曰夫人具性命道德之蘊  
通天地萬物之情達禮樂刑政之用充而大之  
使民與物不失其所是乃天職不然是自棄耳  
夫欲有爲要必爲天子輔相乃可此外不足盡  
力復自嘆曰嘻有命焉自古有志之士其不能  
致者蓋亦多矣縱能致之不如伊尹之於湯傳  
說之於高宗諸葛孔明之於蜀先生亦具臣爾  
然又自度上不繫於天下不繫於人而能有功  
德及人獨惟醫爾然我亦不喜爲世族醫僥倖

射利必爲神醫其立志如此其後遊於五湖有葛先生者以醫鳴其術甚神先生已人疾死可立起五湖間人稱爲神醫君聞而喜曰是真吾師也乃營紹介爲先容先生不許曰吾術不以與庸夫君弗爲沮一日躬執贄幣詣先生門下以刺通先生素傲睨不卽出見稍攬衣起從戶隙窺君見君神采燁然曰非庸夫也是能昌吾道者遂出見盡以其術授君故君爲醫大類葛先生會天下大亂君擇地避曰虎林地大人衆易以浮沒故來居焉方是時專制方面者多自官人有薦君者輒避去曰我何可污我何可污未幾今天子革元命向之有官者不問仕輟悉就遣而君夷然如常時方自詫曰吾故民也吾故民也因本其所自出稱洛下遺民云汝南生陳君翰也嗚呼世有斯人哉吾恒記幼時讀詩見詩人敘述武王克商時事其稱有曰殷士膚敏裸將于京第曰帝王革命大率然爾不知其爲悲也及夫運去物改親見其事始三

復而悲之曰嗟乎士固有如此者而程彥澤氏當亂世在衆人中而卒能自全其道嗚然以遺民稱若欲自附於古之賢人者不其偉歟孔子曰斯民也三代之所以直道而行也誰毀誰譽今去孔子雖遠若遺民者亦其人也吾何言哉

程敏政

湯胤勣傳

湯胤勣字公讓濠梁人其曾祖佐

高廟

取天下是爲東甌襄武王胤勣少負才好使氣

貌類河朔人兩眸睜然髭奮起如戟年十五六入學爲生徒日記數萬言學有舊版文千餘字胤勣騎馬過一日成誦應天尹下學傳籌召諸生胤勣獨後至當筭大呼折尹聲撼庭木尹愧憤卒筭之胤勣攘袂走出學門題詩府署合扉上有從今袖却經綸手且向江頭理釣絲之句遂去學出遊江湖上凡吳越間豪家富室爭延致之周文襄公轉運江南聞其名召之至曰王孫能作啓事否胤勣請紙筆卽席具狀幾萬言

類宿構者又切當世務文襄奇之上書薦其才有文武具驛召赴京時于少保方督諸軍請試之立胤勣將臺下萬卒環視于公摘古今將略及諸史中事舉以問胤勣應對如洪鐘不能屈左右嘖嘖歎賞于公亦撫掌曰吾子誠有才入對以爲錦衣衛百戶正統末

英廟北狩

朝廷遣使通問已命中書舍人趙榮擇可副者衆舉胤勣詔以千戶如虜虜大酋脫脫不花問中國事云何榮未及對胤勣前語之又時于坐

上箕踞岸幘朗誦其所著平胡論虜酋色變既出謂中國譯者曰彼髯何爲哉恨不殺之耳景泰中詔舉將才胡忠安公言胤勣才可用進署指揮僉事時典兵者多忌胤勣不令治事胤勣亦時時歎息其功名不偶放浪詩酒間京師人率以爲狂所與遊者最善侍講徐有貞教授馮益太醫劉溥

英廟復位有貞入用事然

亦陰嫉其才不推薦之胤勣亦不登其門天順中按事者甚橫李文達公多裁之而文達嘗召

胤勣與語胤勣張口論天下事及古今成敗一坐盡傾文達愛其才將薦之校事者遂捃拾胤勣往年在江南受賂事下之獄怒而辱之胤勣詬罵不絕口至詆之爲奴然胤勣實出息于人而不立券無以自白遂謫爲民荷校出都城故人有唁之者胤勣仰天笑曰吾子以指揮爲足榮一湯胤勣邪掉首行弗顧成化初遇霈恩復官再用言者言詔以禪帥出守孤山堡孤山在延安西虜歲入之處守者多以軍敗黜胤勣得

詔曰噫吾死矣夫孤山無城郭有他郡之來戍者七百人戰則爲傭軍守則爲怯敵如此雖諸葛武侯復生亦難乎免矣抵鎮草封事數千言大率謂朝廷宜先城孤山聚糧糗募死士又移書當路言狀遂憤憤吐殷血數升臥不能起丁亥虜入寇主將閉城門不出兵虜大掠子女而東胤勣怒髮上指曰死國分也力疾起戎服跨馬率麾下百餘人邀虜于境上力戰數十衆寡不敵遂死山下是年八月也胤勣爲人軒

豁倜儻直欲起古豪傑與之友視世之瑣瑣者  
 以爲齷齪不足與語好以氣雄人不問名位卑  
 顯有不可意奮然去不顧或遂罵之至其人面  
 赤不少貸甚有捶之者江陰知縣弗利于民將  
 受代胤勣率少年數人直入縣廳反縛之狀其  
 罪送上官上官大駭并收下獄凡數歲會赦乃  
 得釋夏郎中時正嘗於宴上與之藏鉤不勝而  
 怒語侵胤勣胤勣就坐上捽之下拳之蹴之衆  
 客爲之股木又嘗過友人家見道士在坐與語  
 不合而罵之道士不知其胤勣也稍稍有憾色  
 胤勣捶之幾死與人言出入經史子籍中縱橫  
 闢闔隨意所如有問古名將者胤勣以張巡岳  
 飛爲第一其人曰岳將軍則聞命矣張睢陽何  
 如人胤勣瞑目曰子不觀其對令狐潮之語乎  
 卿未識人倫焉知天道自唐以下誰有爲此語  
 者其所見如此詩豪邁奇崛如風雨晦冥中電  
 光翕焱使人不敢正視又如雷斧斷崖石下墜  
 不測之淵觀者褫魄每就人席上操觚立成數

十章有名能詩者多爲其所懾或不能措一語  
以遁平生著述有五雲清唱風雅遺音東谷集  
十餘卷無子

史官曰予少與胤勣遊知其人使不死爲大將  
將數萬兵出陰山其功名當不在古豪傑下顧  
獨膏血草莽中天也或者謂胤勣類太史公所  
謂遊俠乃大不然胤勣行事雖若任俠然扣其  
所得朱家郭解直奴才耳烏足以比胤勣哉

皇明文徵卷六十三

十章有名能詩者多爲其所備或不能措一語  
以適平生著述有五雲清唱風雅遺音東谷集  
十餘卷無子

史官曰予少與胤勛遊知其人使不死爲大將  
將數萬兵出陰山其功名當不在古豪傑下顧  
獨膏血草莽中天也或者謂胤勛類太史公所  
謂遊俠乃大不然胤勛行事雖若任俠然如其  
所得宋家郭解直奴才耳烏足以比胤勛哉



